



L'angolo della poesia

Lu disiu

Agghiorna e scura
vota e furria
u tempu nun va via
Lu me pinseru t'assicuta
e granni è lu disiu.
A spiranza s'adduma
'ni lu me cori
n'incuntramu n'abbrazzamu
e nun 'ni lassamu cchiù.

Nino Anzelmo

U me addu

Aveva un sulu addu
ca era tantu beddu
mai lu vitti nuddu
un gnornu mi vulò.

Scinnu nun vicineddu
un certu cumpari Piddu:
"Viristivu u me addu?"
"Mi rispiaci gnur nò".

Vitti cchiù luntaneddu
curriri un picciutteddu
scannulu mi retti iddu
u passu avanzu iò.

Volu comu n'aceddu
e perdu lu cappeddu.
"Pezzu ri vastaseddu
mi l'hà paari tù!".

Prisu si vitti iddu
e scappannu ittò u addu
mi parsì un cagnuleddu
ch' a matri ritruvò.

Accussì truvai u addu
a prezzu ru cappeddu
ora ci stiru u coddu
c' ammenu ummola cchiù.

Giovanni Anselmo da Caccamo

Lu ceusu di Sabucina

Sutta na crista di Sabucina
c'era n'àrbulu di ciusu russia
sulu me nannu sapiva stu pustu
mi ci purtò na jurnata d'agustu.

Arburli di frutta a perdita d'ucchiu
nìspuli, pira, varcochi e cirasi
sutta i piliddi passannu un fessu
n'àrbulu ranni di ciusu russia.

Mi vinni nmenti lu paradisu
quannu tastavu stu fruttu purpusu
mi n'acchianai supra i so rami
e ncumiciai a manciari a manciari.

Alluncava li manu fina ca, stancu,
m'arrizzulavu chinu di sancu.
Me nannu cursi pinsannu ca morsi,
era sulu nchiappatu di ciusi russi.

Michele Butera

Lu munnu a la riversa

Lu munnu è divintatu tantu stranu:
la notti agghiorna e scura lu matinu.
Ci sunnu scecchi cu la liggi mmanu
e dotti scrapisati comu linu.

Iettu la paglia a mari e mi va nfunnu,
ma spessu vi u chiummu natari...
m'addugnu, siddu guardu ntunnu, ntunnu,
ca c'è cu pensa nveci di scurdari.

Canusciu genti, e nni canusciu tanti,
ca la muntagna ci pari pinninu:
la testa nni la coffa e... vannu avanti

e fannu sempri drittu lu caminu.
Lu sbriugnatu, ca prega li santi,
si vesti e mangia comu un signurinu.

Enrico Cacciato (Canicattì 1957)